



Gedeon delivre les Israélites ; & estonne l'armée ennemie avec des trompettes & bouteilles.

LE Seigneur irrité contre Israël, pour auoir laissé ses ordonnances, en adherant aux idolatries Payennes, permit durant sept années que Madian, Amalec, & les nations Orientales, leur pillioient & degastoient tout ce qu'ils auoient semé en herbes, & ce iusques en Gaza, & ne laissoient aucunes choses de ce qui appartenoit à la vie humaine ; en sorte qu'en cette misere ils eurent recours à Dieu, lequel enuoya vn homme Prophete, qui les reprit d'auoir méconnu les graces de Seigneur. L'Ange trouua aussi Gedeon en l'air, escoüant le froment, & luy dit, O tres-fort, le Seigneur est avec toy. Et Gedeon répondant dit, Si le Seigneur est avec nous, comment nous viennent ces maux icy : où sont les merueilles que nos peres nous ont contées, que le Seigneur a faites en leur faueur ; Toutesfois Gedeon ayant reconnu la voix de l'Ange, il fit le sacrifice & rompit l'Autel de Baal ; puis se mit à poursuiure les Madianites ; dont pour effectuer cette entreprise il prit trois cens hommes d'élite, auxquels ils fit prendre à chacun d'eux vne trompette en la main & vne bouteille & vne lampe en l'autre, auxquels Gedeon dit ; Environnez le camp des aduersaires, & quand ie donneray le signal que chacun de vous sonne sa trompette, en cassant vos bouteilles l'vne contre l'autre, & tenans vos lampes en vos mains, criez ; L'épée du Seigneur & de Gedeon, ce qui fut fait. Dont ceux du camp firent tellement éperdus, que fuians qui çà, qui là, s'entretuerent l'vn l'autre.

Des Iuges Chap. 6. & 7.